



**Uunga siunnersuut: Efterskolit aamma paarlaasseqatigiittarnermut tapiissutit pillugit Inatsisartut inatsisaata allanngortinnissaa pillugu Inatsisartut inatsisaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)  
(Siullermeerneqarnera)

Qujanaq Naalakkersuisunut siunnersuummut, Demokraatinit tapersikkatsinnut.

Ilinniartitaanermut aningaasaliineq, inuiaqatigiittut uagut iliuuserisinnaasatta, pingaarnerpaat ilagaat. Ilinniartitaanermi tamarmi pitsaasunik sinaakkusiinissaq pingaaruteqarpoq, amerlanerpaat ilinniagaqarnissaminnik periarfissinneqassammata inuunerminnilu namminneq aqqutissartik toraagalerlugu. Ilinniarneqarsinnaasutut periarfissat qaffassarutsigit, inuk ataasiakkaatut aammalu ataatsimoorneq qaffassassavagut.

Tamanna tunngavigalugu alloriarneq pingaartuuvoq, periarfissiigatta Savalimmiuni efterskolernermi pisortaniit tapiissuteqarsinnaanermik. Taamaaliornikkut inuusuttatsinnut oqinnerulissaaq nunanut avannarlernut killernut peqataanerulernissamut, inuusuttut nunat killeqarfii akimorlugit naapissinnaalerlutik, ilinniarsinnaalerlutik misilittakkanillu avitseqatigiissinnaalerlutik. Isumaqarpugut, kalaallit aamma savalimmiormiut inuusuttai assigiissuseqartorujussuusut, pissusissamisoortutullu isigalutigu, efterskoleni naapinnermikkut imminnut nunagisartillu pillugit iluatinnaatilinnik ilisimasaqalersinnaasut.

Siunnersuutip uuma aammattaaq Danmarkimi frie fagskoleniinnerni tapiiffigineqarsinnaalerneq ammaappaa. Tamanna iluarisimaartorujussuuarput. Inuusuttut tamarmik atuagarsornermik nuannarisaqartuunngillat, amerlanernullu assassortariaanerusunik ilinniagaqarneq, kajumissuseqarnerulernermik iluatsitsilluarnermillu pilersitsisinnaalluni. De frie fagskoler atuartunut piginnaasanik misileraanissamut periarfissiisaarpoq, soqutigisanik takunnilerneq aammalu iluatsittumik toraagaqarnissamik. Demokraatinut pingaarnerpaavoq, inuusuttut tamarmik – qanorluunniit nukittuffeqarunik unammilligassaqarunilluunniit – ilinniagaqarnissamut- aamma suliffeqarnissamut misiliinissamut periarfissinneqarnissaat.

Siunnersuut ilinniartitaanitta ataatsimoortup nukittunerulernissaatut isigaarput. Inuusuttut aqqutissaannik amerlanernik toqqaanissaannik tuninerisigit, taamaatiinnarnissaannik ikilisaasinnaavugut. Taamaaliornitsigullu amerlanerit inuusuttut ilinniagaannut, assassorluni sulinerneq imaluunniit suliffeqarnerneq ingerlariaqqinnissaannut ikiorsinnaavagut, taamaaliornermikkut tapeeqataalissammata. Taamaaliorneq inummut ataatsimut aammalu inuiaqatigiinnut pitsaasuusaaq.



Taamatut oqaaseqarlunga nalunaarutigissavara, Demokraatit siunnersuut una akuereqqullugu innersuummassuk aammalu Kultureqaarnermut, Ilinniartitaanermut, Ilisimatusarnermut Ilageeqarnermullu ataatsimiititaliami aappassaaniinginnerani suliareqqinneqarnissaa innersuussutigalugu.